



## Kurze Erinnerung/an den Teutschen Evangelischen Kriegsmann.

**D**ieweil es jeder Allmächtige GOTT von unserer Sünden wegen also geschickt/ daß nicht allein unsere Benachbarte durch vnerhörte Frangsaal vnd Wüterey in ein eusserstes Blutbad/ sondern auch vnser ge'iebtes Vaterland selbst in Augenscheinliche Kriegsgefahr danhenhero gesetzt/ vnd wir nicht weniger als jene/ durch des Römischen Antichristes vnd Pfäffischen Hauffens/ auch Spaniers/ vnd der Spaniolisirten Practicken/ trohen/ vnd Lermen blasen/ auch würcklichen Verfassungen/ durch welches alles sie vns von des H. Evangelij wegen nun diese ganze hundert Jahr/ sonderlich aber diese letzte zweinzig Jahr vber / zu hindergehen / kleinmütig zu machen/ auch gar zu überwältigen vnd zu vnterdrucken begeren/ vber so viel vnd beharliches bitten/ flehen vnd anhalten vmb gemeinen Frieden im Reich/ vnd vmb lang versprochene Abheffung der vnerträglichen eingerissenen Beschwerden / zu einer endlichen natürlich zugelassenen rechtmessigen Gegenverfassung/ vnd Nothwehr gedungen werden. Als wollen wir nicht zusehen / daß wir durch frembde Nationen/ vnd das Spanische vnd Welsche Volck/ auff welche Macht allbereit ( will nicht sagen unsere Bischoff vnd Erzbischoff ) sondern wol auch so gar ihre Bawren im Ringkaw vnd Brurhein bochen vnd trohen/ von Hauß vnd Hof vertrieben/ an Leib/ Ehr/ Gut/ Weib vnd Kindern verderbt/ vnd von dem allein seligmachenden Evangelio Jesu Christi vnser einigen Heylands/ mit gewaltiger blutdürstiger Hand/ vnd Verheerung vnser Vaterlands / widerumb vnter die Tyrannen vnd in das Egyptische Diensthauß des Römischen Pharaonis / darauff vns der gütige getreue GOTT einmal so wunderbarlich geführt vnd erlöset hat/ gezwungen werden. So hat mich zu dieser sachen hoch von nöhten gedunckt/ den Teutschen Evangelischen Kriegsmann etlicher stück in der kürze zu erinnern / damit diese Gegenwehr auff den fall der Noth zur Rettung vnser aller/ vnd zu ehren des H. Wort Gottes fürgenommen/ auß hülfte des Allmächtigen/ wol vnd seliglich/ wie es Christen zustehet/ angestellt vnd zum guten end gebracht werden möge.

Ersilich/ weil vns GOTT nicht vmb vnser sonder vmb seinet willen auff diese Welt geboren werden lassen / auch nicht für vns allein / sondern dem Vaterland zum besten/ dessen Glieder wir alle seyn: Als will einem jeden from-